

REGIONAL NEWS BULLETIN

HEADLINES (EVENING)

1. Naktip, Thawhlejni zing dar 7 leh tlai dar 4 inkara Sinlung Hills Council inthlan vote thlak tur atana campaign hun,nichin tlai dar 4 khan a tawp .
2. Khawvel Sunday School Ni chu khawvel hmun dang rualin Mizoramah pawh urhsun taka hman a ni.
3. Mizorama raltlan 40,000 chuang awmte tana central sorkarin cheng vaibelchhe 5 hu buhfai a pek tur chu tihfel a la ni lo.
4. Prime Minister Narendra Modi-a'n TB natna vei zat tlahniam chu hemi kawnga India-in theihtawp a chhuah vang a ni, a ti.

<><><>

SHC CAMPAIGN ENDS

Naktip, Thawhlejni zing dar 7 leh tlai dar 4 inkara Sinlung Hills Council inthlan vote thlak tur atana campaign hun chu nichin tlai dar 4 khan a tawp ta.

State Election Commissioner Dr. H. Lalthlanglana chuan dan angin inthlan vote thlak hun tawp atanga chhiar let a darkar 48 atangin campaign phal a ni tawh lo niin a sawi a. He mi hun chhung hian political party, candidate leh anmahni puittu tumah engti kawng maha vote zawn khap a ni a ti. Zawhna chhangin state election commissioner chuan tum inthlan campaign chhungin an hnenah election model code of conduct bawhchhia a inpuhna thlen an awm loh thu a sawi a. A lo awm a nih pawhin state election commission thleng lovin distric election officer-te'n an ching fel thei zel a nih a rin thu a sawi a. Inthlang tura inbuatsaihna tluang taka a kal thu sawiin Pu H. Lalthlanglana chuan lawmthu a sawi a, Sinlung Hills Council inthlanna atana vote neite chu vote thlak vek turin a sawm a ni.

Campaign hun tawp hnu-ah chuan candidate leh election agent te leh party office bearer, state in-charge a ruat te tih loh bial pawn atanga campaign tura kal, bial chhunga a vote nei si lo te chuan bial an chhuahsan tawh tur a ni a. Hemi hun chhung hian Electronic Media/ Social Media leh a tlukpui dangte ah inthlan kaihnawih, mipui rilru sukthlek tidanglam thei thilte tarlan/chhuah phal a ni tawh lova ni. Hemi chhung hian mipui ngaihnan lakna 'Opinion Poll' siam leh 'exit poll' (Vote thlak zote kawmna/zirbingna atanga inthlan result rinlawkna) buatsaih loh tur a ni a, hei hian vote thlak tan hun atanga a zawh hnu darkar chanve thleng a huam ang. Representation of the People Act, 1951 sec. 130 in a sawi angin inthlan ni-ah hian polling station atanga metre 100 huamchhung ah vote dilna anga ngaih thei thil reng reng tih phal a ni lo bawk a ni.

Sinlung Hills Council hi Aizawl, Saitual leh Kolasib district chhunga awm a ni hlawm a. Aizawl district-ah bial 6, Saitual district-ah bial 4 leh Kolasib district-ah bial 2 a awm a.

Puan tawh angin Aizawl district bawrhsap Pu C. Lalhriatpuia chuan nimin tlai khan thupek chhuahin November ni 2 atanga Sinlung Hills Council inthlanna zawhfel a nih hma chuan ramri khar a nih thu a puang a. Hei hi inthlan tihbuai tum misualte an lo luh theih lohna atana tih a ni a. Aizawl district bikah chuan Zokhawthiang, Khawpuar, Vaitin leh New Vervek khua, Manipur atanga luhkate a huam a ni.

<><><>

CHAMPHAI HARVESTING

Tunlai hian Mizoram leilet zau ber Champhai zawlah buh seng runpui neih mek a ni.

'Mizoram buh thleng' ti a sawi thin, Champhai leilet zawla buh seng mek lai hian Tiau lui dunga leilet zau tak tak awmna, Laili-phai leh Zilhri phai-ah chuan loneitu tam zawkin buh an la seng lo. Tiau lui dung, East Tuipui bial hmun tam zawk a mite chuan tun thla, Sahmulphah thla chawhnu lamah buh hi an seng tan dawn chauh a ni. Kumin hian Fur laiin ruahtui a tla hmain a tla tha a, kum dang zawng aiin loneituten buh an phun hma theiin Tui neih that loh vanga Buh phun thei lo pawh an tlem a, Champhai zawl bikah chuan buh

seng tawh zingah kum dang aiin buh thar hi a hlawk a, kumin hian kum dang zawng aiin Khawl hmanga buh at/zai leh vua an thahnemin, khawl tha chakna hmanga buhseng an thahnem hle.

Hetihlai hian nimin tlai khan Ministry of Agriculture and Farmers' Welfare-a Joint Secretary Pu Franklin L. Khawbung chuan Champhai a tlawh a. District Agriculture Officer Pu Lalmalsawma leh a thawhpui ten lo dawngsawngin DAO chuan Champhai zawla chhum lo chat lova thlai chi hrang hrang tharchhuah a nih theihna tura hma lakpui turin a ngen a. Chumi atana ruahmanna siamte a hnenah lo thlenin leilet a thlai chinte chawm thei tur Tuidahkhawlna lian pathum vel Champhai zawla siam a nih theih chuan thal laia Loneituten tui lama harsatna an tawh thin sutkian a nih theih a beisei thu a lo thlen a ni. Pu Franklin L. Khawbung hian Champhai a a cham chhungin Agriculure department hma lakna hrang hrangte a tlawh ang a, Naktip, Thawhlejni ah Vaphai khuua Vaimim seng runpui a telpui dawn a ni.

<><><>

SUNDAY SCHOOL

Khawvel Sunday School Ni chu khawvel hmun dang rualin Mizoramah pawh urhsun taka hman a ni.

Kumin Khawvel Sunday School Ni-ah hian Mizoram Presbyterian Kohhran chuan chawhma leh chawhnuah hemi ni pual hian hun an hmang a, puitling sunday schoolah 'Bible Pathian thu nung' thenkhatna zir ani a, chawhnu ah then hnihna zir a ni a, Mizoram Baptist Kohhran chuan kohhran tinah Pathianni zing inkhawm ah thupui thlan sa hmangin thupui ngaihthlak a ni a, kumin Khawvel Sunday School Ni thupui chu "Pathian thu kan kawng entu" tih a ni. Hemi ni hian Sunday School-ah pawh Khawvel Sunday School Ni puala zir tur buatsaih chu zir a ni.

Sunday School hmasa ber chu kum 1781 khan din a ni a. India ramah pawh William Carey leh a thian ten Serampore-ah kum 1800 khan an din ve leh a ni. Mizoramah kangkai zelin April ni 21, 1895 khan Baptist Kohhran chuan Sunday School hmasaber hi an din ve leh a, Presbyterian Kohhran chuan kum 1898, Feb ni 20 khan Rev. DE Jones hovin an din ve leh tih chu an pawmdan a ni thung.

<><><>

RICE FOR REFUGEES

Mizorama raltlan 40,000 chuang awmte tana central sorkarin cheng vaibelchhe 5 hu buhfai a pek tur chu tihfel a la ni lo.

Home department hotute hnen atanga thudawn danin Food Corporation of India (FCI) hnen atanga buhfai lak chhuah phalna 'release order' an la hmuh loh avangin Food, Civil Supplies & Consumer Affairs department hotute chuan buhfai hi an la chhuak thei rih lo niin an sawi a. Buhfai sem tur metric tonne 1,379 leh quintal 34 lak chhuah phalna FCI-in an la pek loh chhan hi buhfai man tur pawisa an la dawn loh vang niin an sawi thung. Home department hotute chuan hemi chungchang hi Ministry of Home Affairs a thlen leh a ngaih thu an sawi a. MHA hnenah hian buhfai man tur hi pe chhuak thuai tura ngen rualin a lak chhuah leh sem chhuah hun an bituk pawh pawtsei tura ngen a ngai dawn a ni, an ti a ni. Ruahman dan chuan buhfai hi FCI atangin Supply department-in an la chhuak ang a home department nen tangrualin district hrang hrang thuneitute hnena an mamawh dana sem a, chu chu raltlante hnena sem leh tur a ni.

Ministry of Consumer Affairs, Food & Public Distribution chuan September ni 19 khan buhfai metric tonne 1,379 leh quintal 34 Supply department-ah lakchhuah phalna rawn pe-in ni 60 chhunga chingfel vek tura ruahman a nih thu a rawn hriattir a. Heti chung hian ni 45 a liam hnu-ah pawh engmah a la kalpui thei lo ni a hriat a ni.

Tun dinhmunah hian Myanmar raltlan hi mi 33,004 Mizoramah an awm mek a, Bangladesh atanga raltlan rawn lut hi 2,014 awmin Manipur lam mi hi 4,200 chuang hret awm ang a chhut a ni.

<><><>

DRUG-RELATED DEATHS

Kumin thla 10 (January leh October) inkar chhung khan ruihhlo hmansual vangin Mizoramah mi 61 an thi a, an zinga 8 chu hmeichhia an ni. Excise & Narcotics department chhinchhiah danin kumin October ni 14 hnu-ah ruihhlo vanga thi an la awm leh rih lo. Kum 1984 atang khan Mizorama ruihhlo hmansual avanga thi chhinchhiah tan a ni a, kum 1984 khan heroin vangin mi pakhat a thi a. Kum 1984 atanga tun thleng hian ruihhlo vangin mi 1,871 an thi tawh a. An zinga 1,644 chu mipa ni-in 227 chu hmeichhia an ni. Mizo thalaite'n an thih chhan tam ber chu nachawkna damdawi spasmo proxyvon leh parvon spa hmanga inchiu a ni a. Heroin leh damdawi dang ruih kawp leh heroin hmangte'n an dawt leh a ni.

<><><>

PM LAUDS DECLINE IN TB

Prime Minister Narendra Modi-a'n TB natna vei zat tlahniam chu hemi kawnga India-in theihtawp a chhuah vang a ni, a ti. He thu hi social media-ah tarlangin Pu Modi-a chuan mipui thawhhona nen TB awm lohna India siam turin sorkar in hma a la zel dawn a ni, a ti.

WHO sawi danin kum 2015 atanga 2023 chhung khan India rama TB vei zat chu zaa 17.7-in a tlahniam a, hei hi khawvel pum huapa TB vei tlakhniamna, zaa 8.3 aiin a hniam zawk fe a ni.

<><><>

BJP'S MANIFESTO FOR J'KHAND RELEASED

Jharkhand assembly inthlan lo awm tura BJP inzawrhna, manifesto chu vawiin khan BJP hruaitu senior, Union Home Minister Amit Shah-a'n Ranchi-ah a tlangzarh.

Thu sawiin Pu Shah-a chuan BJP thlan tlin anih chuan Jharkhand-ah Uniform Civil Code (UCC) hman a ni ang a, tribal-te erawh chu UCC huam tir a ni lovang, a ti a, he dan hi Bangladesh atanga Santhal Pargana-a rawn lut ru thinte danna tura ruahman a ni, a ti.

Thenawm ram atanga dan lova lo lute hian tribal hmeichhiate, nupuiah neiin tribal-te ram an chhuhsak thin tih sawiin UCC dan hmangin tribal-te chu an ram pek let a ni ang, a ti a, Gogo-Didi Yojana hnuaiah state chhunga hmeichhia zawng zawngte chu thla tin cheng 2100 pek thin an nih tur thu leh chhungkaw tin hnenah cheng 500-in eirawngbawlna gas pek an nih tur thu sawiin Diwali leh Rakshabandhan pualin a thlawnin eirawngbawlna gas bur 2 sem thin a ni ang, a ti bawk.

<><><>